

**Uunga siunnersuut: Suliffeqarnermi innersuussisarneq il.il. pillugit Inatsisartut
inatsisaat nr. xx, xx 2014-imeersoq**
(Inuussutissarsiornermut Aatsitassarsiornermullu Naalakkersuisoq)

pillugu

Inuussutissarsiornermut Ataatsimiititaliap

ISUMALIUTISSIISUTAA

Siunnersuutip aappassaneerneqarnerani saqqummiunneqartoq

Ataatsimiititaliaq suliarinninnermi ukuninnga inuttaqarpoq:

Inatsisartunut ilaasortaq Knud Kristiansen	(A) siulittaasoq
Inatsisartunut ilaasortaq Ruth Heilmann	(S) siulittaasup tullia
Inatsisartunut ilaasortaq Karl Lyberth	(S)
Inatsisartunut ilaasortaq Andreas Uldum	(D)
Inatsisartunut ilaasortaq Aqqaluaq B. Egede	(IA)
Inatsisartunut ilaasortaq Lars P. Mathæussen	(S) sinniisoq
Inatsisartutmedlem Saxtorph Didriksen	(S) sinniisoq

UPA2014-imi siullermeinerup kingorna ataatsimiititaliap siunnersuut oqaluuseraa matumuunalu isumaliutigisani Inatsisartunut saqqummiullugit.

1. Siunnersuutip imarisaa siunertaalu

Suliffeqarnermi innersuussisarneq pillugu Inatsisartut peqqussutaat ulloq 1. januar 2004-mi atuutilersoq ataatsimut isigalugu siunnersummi ingerlateqqinnejqarpoq.

Nuttarnerulersitsiniarluni tapiissutinik tunniussinissamut periarfissaq naapertuitinngitsumik killeqartoq paasineqarmat inatsisisstatut siunnersuut una suliarineqarpoq. Ajornartorsiu tamanna pinngitsoortissimaniarlugu inatsit allanngortinniarneqarpoq, taamaalilluni ilaatigut aalisarnerup ulapinnarnerpaaffiani suliffeqarnermi sulisussaaleqisarneq ikiorserneqarsinnaaqqullugu. Tamatumani aamma siunertarineqarluni sulisartunik nunanit allaneersunit tikisitsinissap pinngitsoortinneqarnissaa. Ukiup ilaani ulapaarfimmi sulisartut assersuutigalugu aalisakkanik suliffissuarnut assigisaannulluunniit suliartorlutik tamatumalu

kingorna angerlarlutik angalanerannut tapiissuteqarsinnaaneq inatsisissatut siunnersuutikkut aamma periarfissinneqarpoq.

2. Siunnersuutip Inatsisartunit siullermeerneqarnera

Inatsisissatut siunnersuutip piviusunngortinnejarnissaq Inatsisartunit tapersorsorluarneqarpoq. Inatsisartut oqaaseqartartullu taamatut oqariartuuteqarnerat Inuussutissarsiornermut Ataatsimiititaliamit tusaatissatut tiguneqarpoq.

3. Tusarniaanermut akissutit

Siunnersuut piffissami 4. december 2013-imit 6. januar 2014-imut ukununnga tusarniaassutigineqarpoq: Naalakkersuisut Siulittaasuata Naalakkersuisoqarfia, Aningaasaqarnermut Nunamullu Namminermut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilaqtariinnermut Inatsisinillu Atuutsitsinermut Naalakkersuisoqarfik, Kommuneqarfik Sermersooq, Qeqqata Kommunia, Qaasuisup Kommunia, Kommuni Kujalleq, KANUKOKA, SIK, GA, Nusuka, Royal Greenland, Halibut, Deloitte, Polarseafood, Artic Prime Production aamma Arctic Green Food.

Aammattaaq siunnersuut Namminersorlutik Oqartussat internetikkut tusarniaaviatigut tamanut tusarniaassutigineqarpoq.

Ukunangna tusarniaanermut akissutit tiguneqarput: Ilaqtariinnermut Inatsisinillu Atuutsitsinermut Naalakkersuisoqarfik, Aningaasaqarnermut Nunamullu Namminermut Naalakkersuisoqarfik, Kommuneqarfik Sermersooq, GA, SIK, ICC, ASG, IMAK.

3.1 Ataatsimiititaliap tusarniaanermut oqaaseqaatai

Piffissat tusarniaaffiusut sulinngiffeqarnerit nalliuuttullu nalaannut inissinnaveersaarneqartarnissaat ataatsimiititaliamit kaammattuutigineqassaaq. Ataatsimiititaliaq tusarniaanermut allanik oqaaseqaatissaqanngilaq.

4. Ataatsimiititaliap siunnersummik suliariinninera

Ataatsimiititaliap aallarniutigalugu oqaatigissavaa siunnersuut Inatsisartunit tapersorsorluarneqartoq, taamaattumillu ataasiakkaaginnarnik oqaaseqaateqarfigineqassasoq.

Assersuutigalugu aalisakkanik suliffissuarni ulapinnerpaaffiup nalaani sulisussat nuttarsinnaanerannut periarfissanik annertusaavigeqqinnejarnissaq Inatsisartut assigalugit ataatsimiititaliamit pitsasutut isigineqarpoq. Tunisassiassanik maangaannartitsinissaq avataaniillu suliartortunik tikisitsinissaq pinngitsoortikkumallugit pisuussutit suliarineqarnissaannut najukkami sulisussanik naammattunik pissarsisinnaanissaq tamatumani qulakkeerniarneqarluni.

5. Siunnersuutip aningaasaqarnikkut kingunerisassai

Siunnersuut akuerineqarpat aningaasaqarnikkut kinguneqassanngitsoq siunnersuummut nalinginnaasumik nassuiaatini oqaatigineqarpoq. Tunngavissat pigineqartut tunngavigalugit allatut naliliinissaminut ataatsimiitaliaq pissutissaqarsorinngilaq. Taamaalilluni Naalakkersuisut apeqqut tamanna sukumiisumik misissorsimassagaat aammalu malitsigisaanik aningaasaqarnikkut kinguneqassanngitsoq ataatsimiitaliamit tutsuigineqarpoq. Siunnersuut naatsorsuutiginngisamik pisortat karsiisa annertunerusumik aningaasartuuteqarnerannik kinguneqassagaluarput aningaasartuutit taakku aningaasaliissutaareersut iluini akilerneqarsinnaassapput, taamaattoqassappallu suliniutinik allanik tunulliussisoqartariaqassalluni.

6. Ataatsimiitaliap inassuteqaatai

Ataatsimiitaliap isumaqatigiittup siunnersuut akuerineqassasoq inassutigaat

Taama oqaaseqarluni isumaliutissiisummilu oqaatigineqartutut paasinnilluni ataatsimiitaliap siunnersuut aappassaaniigassanngortippaa.

Lars P. Mathæussen

Ruth Heilmann

Siulittaasup tullia

Saxtorph Didriksen

Andreas Uldum

Aqqaluaq B. Egede